



ԻՆՉՊԵՍ ՆԱԽԱՁԵՌՆԵԼ ՍԱՀՄԱՆԱԴՐԱԿԱՆ
ՓՈՓՈԽՈՒԹՅՈՒՆՆԵՐ ՔԱՂԱՔԱՑԻԱԿԱՆ
ՆԱԽԱՁԵՌՆՈՒԹՅԱՆ ՄԻՋՈՑՈՎ



Նախագծի մասին

Օրենսդրական առաջարկներ ներկայացնել, մասնակցել խորհրդարանում մշակվող օրենքների նախագծերին, կազմել լիարժեք օրենսդրական նախագծեր և հետևել, որպեսզի դրանք հասնեն խորհրդարան և մտնեն ԱԺ օրակարգ. այս ամենը թվում է բարդ և հասանելի միայն խորհրդարանականներին ու կառավարությանը:

Ամենևին: Մենք նախաձեռնել ենք **«Օրենսդրական այլընտրանք»** ծրագիրը, որպեսզի քաղաքացիական հասարակության կազմակերպություններին և անհատներին ներկայացնենք այն բոլոր՝ օրենքով սահմանված ձևերը, որով նրանք կարող են մասնակցել օրինաստեղծ աշխատանքին, աջակցել իրենց հետաքրքրող ոլորտների կատարելագործմանը, օգնել՝ ավելի լավը դարձնել օրենքները, որոնք գործում են բոլորիս համար:

Մեր կայքի (www.altprojects.am) «Օրենսդրական այլընտրանք» բաժնում կարող եք գտնել ծրագրի իրականացման ընթացքում պատրաստված ուսումնական, ճանաչողական նյութերը, հոլովակները, այլ տեղեկատվություն:

Կայքի մեկ այլ բաժնում՝ «Առաջարկների բանկ» հավելվածում, կարող եք ինքներդ գտնել այն հանձնաժողովը, որի ենթակայության տակ գտնվում է այս կամ այն՝ ձեզ հետաքրքրող ոլորտը, և ներկայացնել սեփական ծրագրային առաջարկը:

Ծրագրի ղեկավար՝ Էլինար Վարդանյան

«Այլընտրանքային նախագծեր խումբը» հասարակական կառույց է, որի անդամները մշակում և ներկայացնում են հանրային կյանքի առավել ցավոտ ու կարևոր խնդիրների շուրջ սեփական, այլընտրանքային լուծումները:

Սույն ծրագրի իրականացումը հնարավոր է դարձել Ամերիկայի ժողովրդի աջակցությամբ՝ ԱՄՆ Միջազգային զարգացման գործակալության միջոցով, «ՀԿ Դեսպո - Հասարակական կազմակերպությունների զարգացման ծրագրի» շրջանակում: Ծրագրի շրջանակներում ստեղծված նյութերի բովանդակությունը կամ արտահայտված տեսակետները միմիայն Այլընտրանքային նախագծեր խումբ հասարակական կազմակերպության և Եվրասիա համագործակցություն հիմնադրամի են և պարտադիր չէ, որ արտահայտեն ԱՄՆ ՄԶԳ կամ ԱՄՆ կառավարության տեսակետները

ՈՒՂԵՑՈՒՅՑ

ԻՆՉՊԵՍ ՆԱԽԱՁԵՌՆԵԼ
ՍԱՀՄԱՆԱԴՐԱԿԱՆ ՓՈՓՈԽՈՒԹՅՈՒՆ

*Քաղաքացիական նախաձեռնության
միջոցով*

Ինչ փոխվեց Սահմանադրական հանրաքվեի արդյունքում

2015թ. կայացած՝ Սահմանադրական հանրաքվեի արդյունքում ՀՀ հիմնական օրենքը կրեց մի շարք լուրջ փոփոխություններ: Առավել խոշորների մասին բոլորը, թերևս տեղյակ են՝ անցում կատարվեց կառավարման խորհրդարանական ձևին, ընդլայնվեցին վարչապետի լիազորությունները, համապատասխանաբար՝ պակասեցին նախագահի իրավասությունները: Նաև՝ սակավացան քաղաքացիների կողմից կատարվող ուղիղ ընտրության հնարավորությունները, քանի որ այսուհետ խորհրդարանի անդամներն են՝ ըստ քաղաքական մեծամասնության որոշման կամ կոալիցիոն պայմանավորվածությունների, ընտրում վարչապետին և նախագահին, հաստատում կառավարության կազմը:

Այնուամենայնիվ, Սահմանադրության նոր տարբերակում հայտնվել է **նոր դրույթ**, որը մինչ այս քչերի ուշադրությունն է գրավել: Այսուհետ հնարավոր է դարձել ՀՀ Սահմանադրության մեջ փոփոխություններ նախաձեռնել՝ շրջանցելով ԱԺ և Կառավարությունը, միայն քաղաքացիական նախաձեռնության միջոցով:

Իհարկե, այդ նախաձեռնությունը ամենևին հեշտերից չէ, պահանջում է մեծագույն կոնսոլիդացիա, կազմակերպչական հսկայական աշխատանք և ռեսուրսներ: Այնուամենայնիվ, այն նախատեսված է, ինչպես և նախատեսված է այն ողջ մանրամասն ընթացակարգը, որով պետք է շարժվի նման փոփոխություններ նախաձեռնող խումբը:

Այս ուղեցույցում կներկայացնենք բոլոր քայլերը, որոնք նախատեսված են ՀՀ օրենսդրությամբ:

Ո՞ր օրենքով են սահմանվում Սահմանադրական փոփոխությունների անցկացման հնարավորությունները

«Սահմանադրության 15-րդ գլուխը հստակեցնում է.

- Սահմանադրության ընդունման ու փոփոխության սահմանադրական հիմքերը,
- հանրաքվեի դրվող հարցերի շրջանակը,
- առավել ճկուն է դարձնում սահմանադրական փոփոխությունների գործընթացը՝ դրանում բարձրացնելով խորհրդարանի դերը, նախատեսում է քաղաքացիական նախաձեռնությամբ հանրաքվեների անցկացում,
- սահմանում է վերպետական միջազգային կազմակերպություններին միանալու վերաբերյալ հարցերով հանրաքվե անցկացնելու պահանջ:

Ինչպե՞ս է հնարավոր ընդունել նոր Սահմանադրություն

Նոր Սահմանադրության ընդունումը հնարավոր է միայն հանրաքվեի միջոցով:

Ինչպե՞ս է հնարավոր փոփոխություններ կատարել գործող Սահմանադրության մեջ

Գործող Սահմանադրության մեջ **որոշ** փոփոխություններ անել հնարավոր է երբեմն նույնիսկ առանց հանրաքվեի անցկացման: Սակայն կան հողվածներ, որոնք հնարավոր է փոփոխել միայն հանրաքվեի միջոցով:

Սահմանադրական կարգի հիմունքների, մարդու իրավունքների և առանցքային նշանակություն ունեցող այլ դրույթների փոփոխությունը, ըստ Սահմանադրության 202-րդ հոդվածի 1-ին մասի, կարող է կատարվել բացառապես հանրաքվեի միջոցով:

Բացառապես հանրաքվեի միջոցով կարող են փոփոխվել.

- Սահմանադրական կարգի հիմունքները¹,
- Մարդու և քաղաքացու հիմնական իրավունքները և ազատությունները²,
- Տնտեսական, սոցիալական և մշակութային ոլորտներում օրենսդրական երաշխիքները և պետության քաղաքականության հիմնական նպատակները³,
- Դատարանները և բարձրագույն դատական խորհուրդը⁴,
- Մարդու իրավունքների պաշտպանը⁵,
- Սահմանադրության ընդունումը, փոփոխությունը և հանրաքվեն⁶,
- Ազգային ժողովի կարգավիճակը և գործառույթները⁷,
- «Ազգային ժողովն ընտրվում է համամասնական ընտրակարգով:» դրույթը⁸,

1 Սահմանադրության 1-ին գլուխ

2 Սահմանադրության 2-րդ գլուխ

3 Սահմանադրության 3-րդ գլուխ

4 Սահմանադրության 7-րդ գլուխ

5 Սահմանադրության 9-րդ գլուխ

6 Սահմանադրության 15-րդ գլուխ

7 Սահմանադրության 88-րդ հոդված

8 Սահմանադրության 89-րդ հոդված, 3-րդ մաս 1-ին նախադասություն

- «Ազգային ժողովն ընտրվում է հինգ տարի ժամկետով:» դրույթը⁹,
- «Ազգային ժողովի կանոնակարգը, Ընտրական օրենսգիրքը, Դատական օրենսգիրքը, Սահմանադրական դատարանի մասին օրենքը, Հանրաքվեի մասին օրենքը, Կուսակցությունների մասին օրենքը և Մարդու իրավունքների պաշտպանի մասին օրենքը սահմանադրական օրենքներն են և ընդունվում են պատգամավորների ընդհանուր թվի ձայների առնվազն 3/5-ով: Սահմանադրական օրենքի իրավակարգավորումը չպետք է դուրս գա իր առարկայի շրջանակներից:» դրույթը¹⁰,
- Ազգային ժողովի քննիչ հանձնաժողովները¹¹,
- Վարչապետին անվստահություն հայտնելը¹²,
- Ռազմական դրությունը¹³,
- Արտակարգ դրությունը¹⁴,
- Հանրապետության նախագահի կարգավիճակը և գործառույթները¹⁵,
- Հանրապետության նախագահի լիազորությունների ժամկետը և նրան ներկայացվող պահանջները¹⁶,
- Հանրապետության նախագահի ընտրության կարգը¹⁷,

9 Սահմանադրության 90-րդ հոդված 1-ին մաս

10 Սահմանադրության 103-րդ հոդվածի 2-րդ մաս

11 Սահմանադրության 108-րդ հոդված

12 Սահմանադրության 115-րդ հոդված

13 Սահմանադրության 119-րդ հոդված

14 Սահմանադրության 120-րդ հոդված

15 Սահմանադրության 123-րդ հոդված

16 Սահմանադրության 124-րդ հոդված

17 Սահմանադրության 125-րդ հոդված

- Կառավարության կարգավիճակը և գործառույթները¹⁸,
- Վարչապետի ընտրությունը և նշանակումը¹⁹,
- Զինված ուժերը²⁰,
- «Կենտրոնական բանկը թողարկում է Հայաստանի Հանրապետության արժույթը՝ հայկական դրամը:»²¹ դրույթը:

Ո՞ր փոփոխություններն են, որ Սահմանադրության մեջ հնարավոր է անել առանց հանրաքվեի

Սահմանադրության **մյուս բոլոր** հոդվածներում փոփոխությունները կարող են ընդունվել Ազգային ժողովի կողմից՝ պատգամավորների ընդհանուր թվի ձայների առնվազն 2/3-ով:

Ովքեր ունեն Սահմանադրության մեջ առանց հանրաքվեի անցկացման փոփոխություններ նախաձեռնելու իրավունք

Նման նախաձեռնության իրավունք ունեն ԱԺ պատգամավորների ընդհանուր թվի առնվազն 1/4-ը, Կառավարությունը կամ ընտրական իրավունք ունեցող **150000** քաղաքացի /ընթացակարգը՝ ստորև/:

Ովքեր ունեն Սահմանադրական փոփոխությունների հարցով հանրաքվեի անցկացում նախաձեռնելու իրավունք

Որպես նախաձեռնող սուբյեկտներ կարող են հանդես գալ պատգամավորների ընդհանուր թվի առնվազն 1/3-ը, Կառավարութ-

18 Սահմանադրության 146-րդ հոդված

19 Սահմանադրության 149-րդ հոդված

20 Սահմանադրության 155-րդ հոդված

21 Սահմանադրության 200-րդ հոդվածի 4-րդ մաս

յունը կամ ընտրական իրավունք ունեցող **200 000** քաղաքացի:

Ինչպե՞ս է Սահմանադրական փոփոխությունների նախագիծն ընդունվում խորհրդարանում

Ազգային ժողովը նախագիծը հանրաքվեի դնելու վերաբերյալ որոշումն ընդունում է պատգամավորների ընդհանուր թվի ձայների առնվազն 2/3-ով: Եթե նախագիծն ընդունվում է, ապա այն պարտադիր կերպով դրվում է հանրաքվեի:

Եթե Ազգային ժողովում Սահմանադրության փոփոխության նախագիծը չի ստանում պատգամավորների ընդհանուր թվի 2/3-ի աջակցությունը, ապա այն պատգամավորների ընդհանուր թվի ձայների առնվազն 3/5-ով ընդունված որոշմամբ կարող է դրվել հանրաքվեի:

Ինչպե՞ս է ներկայացվում Սահմանադրական փոփոխությունների նախագիծը պատգամավորների կամ Կառավարության կողմից

Սահմանադրության փոփոխությունների նախագիծն Ազգային ժողովի քննարկմանն է ներկայացվում Ազգային ժողովի նախագահին ուղղված պաշտոնական գրությամբ՝ Աշխատակազմի միջոցով: Պաշտոնական գրությունում նշվում են՝

- Սահմանադրության փոփոխությունների նախագծի անվանումը և շրջանառության մեջ դնելու հիմքերը՝ Սահմանադրության և ԱԺ Կանոնակարգի համապատասխան նորմերին կատարված հղումներով,
- հիմնական զեկուցողի անունը, ազգանունը,

- գրությանը կամ ստորագրաթերթին կից ներկայացվող փաստաթղթերի ցանկը:

Գրությանը կից ներկայացվում են՝

- Սահմանադրության փոփոխությունների նախագիծը,
- Սահմանադրության փոփոխությունների նախագիծը հանրաքվեի դնելու վերաբերյալ Ազգային ժողովի որոշման նախագիծը՝ ԱԺ Կանոնակարգով նախատեսված դեպքում,
- Սահմանադրության փոփոխությանը վերաբերող հարցով Սահմանադրական դատարան դիմելու մասին Ազգային ժողովի որոշման նախագիծը,
- Սահմանադրության փոփոխությունների նախագծի հիմնավորումը, որտեղ նշվում են առկա խնդիրները, առաջարկվող կարգավորումները և ակնկալվող արդյունքները, ինչպես նաև հեղինակի հայեցողությամբ՝ նախագիծը մշակողների անունները, դրանց մշակման համար հիմք հանդիսացած հայեցակարգերի, իրավական ակտերի կամ այլ նյութերի վերաբերյալ տեղեկություններ,
- տեղեկանք, որտեղ տեսանելի ձևով՝ ջնջված կամ լրացված ներկայացվում են Սահմանադրության հոդվածներում առաջարկվող բոլոր փոփոխությունները:

Ինչպես է ներկայացվում Սահմանադրական փոփոխությունների նախագիծը Քաղաքացիական նախաձեռնությամբ

Քաղաքացիական նախաձեռնությունը նախ պետք է գրանցվի Կենտրոնական ընտրական հանձնաժողովում: Այնուհետև պետք է կազմի պաշտոնական գրություն՝ ուղղված ԱԺ նախագահին՝ ըստ վերը նշված օրինակի: ՔՆ նույնպես պետք է ԱԺ

ներկայացնի վերը նշված փաստաթղթերը, և դրանց կից՝ ԿԸՀ նիստի արձանագրության քաղվածքը, որտեղ նշվում են քաղաքացիական նախաձեռնության գրանցման տվյալները և լիազոր ներկայացուցչի անունը, ազգանունը:

Ինչ ընթացք կարող է ստանալ Քաղաքացիական նախաձեռնությունը

Եթե նախաձեռնության վերաբերյալ պաշտոնական գրությունը **համապատասխանում է** սահմանված պահանջներին, ապա գրությունը ստանալուց հետո՝ 3 աշխատանքային օրվա ընթացքում, Ազգային ժողովի նախագահը նշանակում է գլխադասային հանձնաժողով և Սահմանադրության փոփոխությունների նախագիծը դնում է շրջանառության մեջ:

Եթե այն սահմանված պահանջներին **չի համապատասխանում** և 3 աշխատանքային օրվա ընթացքում դրանց չի համապատասխանեցվում, ապա Ազգային ժողովի նախագահը գրությունը և դրան կից ներկայացված փաստաթղթերը վերադարձնում է նախաձեռնության հեղինակին՝ նշելով պատճառների մասին:

Ինչպես է ԱԺ քննարկում Սահմանադրության փոփոխությունների նախագիծը

Սահմանադրության փոփոխությունների նախագիծն Ազգային ժողովում քննարկվում է 2 ընթերցմամբ՝ օրենքների նախագծերի քննարկման համար սահմանված կարգով:

Մինչև Սահմանադրության փոփոխությունների նախագիծը 2-րդ ընթերցմամբ և ամբողջությամբ ընդունելը քվեարկութ-

յան է դրվում Սահմանադրության փոփոխությանը վերաբերող հարցով Սահմանադրական դատարան դիմելու մասին Ազգային ժողովի որոշման նախագիծը: Եթե որոշումն ընդունվում է, ապա Ազգային ժողովի նախագահը, 2 աշխատանքային օրվա ընթացքում այդ որոշումը՝ Սահմանադրության փոփոխությունների նախագծի հետ միասին (2-րդ ընթերցմամբ քննարկված), ստորագրում և ուղարկում է Սահմանադրական դատարան: Հարցի քննարկումն ընդհատվում է՝ մինչև Սահմանադրական դատարանի որոշումը ստանալը:

Ինչ կարող է կատարվել Սահմանադրական դատարանում

Եթե Սահմանադրական դատարանը Սահմանադրության փոփոխությունների նախագիծը ճանաչում է Սահմանադրությանը հակասող, ապա նախագիծը շրջանառությունից հանվում է:

Եթե ՍԴ Սահմանադրության փոփոխությունների նախագիծը ճանաչում է Սահմանադրությանը համապատասխանող, ապա նրա որոշումը ստանալուց հետո հարցի քվեարկությունն անցկացվում է Ազգային ժողովի առաջիկա հերթական նիստերում:

Ինչպես են ընթանում քվեարկությունները հաստատման դեպքում

1) Փոփոխությունները **հանրաքվեով կատարելու դեպքում** քվեարկության է դրվում ԱԺ որոշման նախագիծ՝ Սահմանադրության փոփոխությունների նախագիծը հանրաքվեի դնելու մասին, որը պետք է ընդունվի պատգամավորների ընդհանուր թվի ձայների առնվազն 2/3-ով.

2) **Առանց հանրաքվեի փոփոխությունների** դեպքում քվեարկության է դրվում բուն Սահմանադրության փոփոխությունների նախագիծը, որն ընդունվում է պատգամավորների ընդհանուր թվի ձայների **առնվազն 2/3-ով**:

Եթե Սահմանադրության փոփոխությունների նախագիծը չի ընդունվում, ապա մինչև 20 րոպե տևողությամբ ելույթով կարող է հանդես գալ հիմնական զեկուցողը՝ ներկայացնելով նախագիծը հանրաքվեի դնելու մասին Ազգային ժողովի որոշման նախագիծ: Հիմնական զեկուցողի ելույթից հետո մինչև 10-ական րոպե տևողությամբ ելույթներով կարող են հանդես գալ խմբակցությունների ներկայացուցիչները, որից հետո որոշման նախագիծը դրվում է քվեարկության: Որոշումն ընդունվում է պատգամավորների ընդհանուր թվի ձայների **առնվազն 3/5-ով**: Եթե որոշումը չի ընդունվում, ապա նախագիծը շրջանառությունից հանվում է:

Ո՞րն է գործընթացի եզրափակիչ փուլը

Ազգային ժողովի նախագահը ԱԺ որոշումը՝ Սահմանադրության փոփոխությունների նախագիծը **հանրաքվեի** դնելու վերաբերյալ, համապատասխան նախագծի հետ 1 շաբաթվա ընթացքում ուղարկում է Հանրապետության նախագահին, որը դրանք ստանալուց հետո՝ 3-օրյա ժամկետում, **նշանակում է հանրաքվե**:

Իսկ այն դեպքում, եթե Սահմանադրության համապատասխան փոփոխությունների նախագիծն ընդունվել է ԱԺ կողմից, մեկ շաբաթվա ընթացքում ԱԺ նախագահն այն ուղարկում է Հանրապետության նախագահին, որն էլ ստանալուց հետո՝ 21-օրյա ժամկետում, ստորագրում և հրապարակում է այն:

ՈՒՂԵՅՈՒՅՑ

ԻՆՉՊԵՍ ՆԱԽԱՁԵՌՆԵԼ ՍԱՀՄԱՆԱԴՐԱԿԱՆ

ՓՈՓՈԽՈՒԹՅՈՒՆ

*Քաղաքացիական նախաձեռնության
միջոցով*

Տպագրվել է «Թայմ թու պրինտ» տպարանում
Չափը՝ 60*80 1/16: Ծավալը՝ 0,75 մամուլ:
Թուղթը՝ օֆսեթ: Տպաքանակը՝ 500 օրինակ:

